

印江縣志
卷一

D663

19651

印江縣志

印江縣志目錄

署知縣事鳳翔鄭士範撰

地理第一

建置第二

祠祀第三

田賦第四

官師第五

人物第六

縣設三百四十有五年矣而無志余意謂如爰徵文

獻畧敘述之翼軫餘分莫知其度地理於具宜先也
作地理第一有地理然後建置之事基焉作建置第
二建置之次者莫祠祀若作祠祀第三賦由田出教
養所資以成民事作田賦第四治民事神官師責也
作官師第五彰往勸來猶有人焉邑無小作人物第
六凡六篇

印江縣志卷之一

地理志第一

印江古思邕之地也隋以前文獻無徵莫詳沿革

黔書

漢牂柯守陳立據思邕詔夜郎王將兵破之思南府志亦云攷漢書西南夷傳陳立臨邕人王鳳薦為牂

柯太守至牂柯諭告夜郎王與興不從命立出行縣至興國且同亭召興與從邑君數十人入見立立數

責因斷頭邑君曰將軍誅亡狀為民除害願出曉士眾以興頭示之皆釋兵降是立誅興定夜郎非立叛

而夜郎王破立也且同亭之即思邕唐開元四年開與否不可知然漢書初未有思邕

生獠置思邕縣屬思州寧夷郡五代時胥淪於蠻宋

建思州領務川邛水安夷三縣而獨廢思邛或曰宋

思州領思邛等四縣

府志云爾攷通志宋政和中蕃部長田祐恭內附始建思州領

務川邛水安夷三縣宣和四年廢州及務川縣為務川城邛水安夷二縣皆為堡紹興元年復為思州仍

領務川等三縣隸夔州路今按邛水長官司屬鎮遠縣而廢邛水縣治無徵意宋之邛水即唐之思邛抑

或割思邛地別為邛水縣而思邛廢為司元改為思堡要其為思邛縣則無稽也姑兩存備考

印江長官司仍隸思州明初隸思南宣慰司改為印

江長官司永樂十一年改隸思南府宏治六年改印

江縣

國朝因之領土縣丞一廣三十里袤百七十里東朗
溪司南銅仁府西安化縣北沿河司此其大畧耳其
村寨孤懸在鄰封地者謂之插花若下五里越婆川
而北猶三日程瑪瑙山直與四川彭水接壤乾賽舖
三溪又逾石阡城南數十百里方隅烏得而論焉城
圍五百一十二丈有奇明知縣文伯築土爲之後或
易甃以石康熙十一年知縣元捷重修不二十年已
圯今且就傾盡矣通志云聖登聳北筆架揖西南瀑

繞村東岡疊秀蓋山環水抱區平如掌可十里餘亦

黔南之勝境也治凡三圖

在城毛
坭網陀

三圖跬步皆山山間皆水皆有脈可循吏苟政成閒
暇次第訪詢當如示掌恨未之能也姑舉其名勝者
太陽山卽城東北所附小山其西山名蕭家坡

白馬巖在城東三里按府志城東三里有文筆山今
目成之無似也惟縣北岩門凱塘皆有尖峯又疑非
府志所云

峩嶺在城東三里上有峩林闕

知府帥機詩峩林渺渺接雲浮百折螺旋

巖上頭十里長林春色好觀風到處是佳遊

其北麓臨江有響水岩

河縫山在縣東七里通志云城西誤也有觀音巖石

龕下洞深不可測

知府劉謙吉詩一線誰分萬仞屏且移征蓋就雲扃流泉石壁尋仙

窟落日杉陰護使星欲借普陀高處卧總教妙相過來聽紛紛叱馭催人去不放塵韉片刻停知縣馬士

芳詩一徑盤迴鎖碧岑雲邊仙窟許誰尋我來坐石聽流水伏虎降龍尚有音武陵徐昌文詩攀援猶未

足仄徑滯歸鞭山鎖千盤水崖分一線天人從去巖猿穴落馬向蟻封旋應是杜陵客艱難蜀道年

里許有肺石

十種山在城南六里其西里許卽白水坡每春水漲瀑布懸崖里人以覘歲豐焉

馬鞍山卽筆架山在城西七里府志稱文峯揖西又文峯朝對學宮者蓋皆指此

雙峽在縣西自西巖至燕子巖西巖有寺宋蹟也其下有敲柳巖巖西有溫泉焉俗名熱水泉又西有滴水崖所謂珠泉滴洞者也燕子巖又在其西

馬士芳
雙峽飛

鴻詩削壁排天一線通凌霄肅羽拂秋風黔南原在衡陽外獨有甲山不斷鴻

大石墩一名玉屏山俗呼爲大聖登在城北五里頂

雪入夏始消石可作杯名爲墨玉其麓有葉魚洞命事

羅沂詩直攀雲霧折山腰曉雨初晴瘴未消北岸人
呼南岸渡前溪水沒後溪橋木籐有子如問欖山果
無名類越椒却使奔馳成底事換將雲鬢作霜條謝
國榷石墩積雪詩翹首看凝素寒光濕翠微迸泉流
且凍枯樹瘦能肥日落仍留照僧歸尙帶暉誰來題
郢曲天半筆花飛馬士芳詩暑樓窗對北山腰冰玉
光寒映帶遙消却人間無
限熱獨存堅白傲陽驕
玉屏之陰有石笋山又北

一里有交椅山

銅鼓山在縣北花崖

印江縣川也源出梵淨山由縣屬之錫土壩流至合

水與金廠木黃之水合流過朗溪司納仁溪至河縫

入縣界繞城東

有關口堰後河堰燕子溝分水灌田

而南

有大堰分水入城西灌田

田而西出於雙峽至朝底入德江舊名思印江印之

為印蓋音轉而字譌也

桶溪縣北門外水西入印江江畔有田謂之芒搭

九道溪在縣南北入印江江溪之間地名中洲其北

岸有龍津寺知縣士芳與諸生講學處也

任元德中洲牧笛詩

二水中分處遙聽牧笛鳴聲歸黃葉渡倦返白雲津
化日人胥樂和風韻自平絃歌成雅俗小草亦生榮
黃世甲龍津漁火詩薄暮龍潭碧牙檣野岸牽釣絲
浮水面燈火徹林煙但有瓢沽酒何愁吏索錢江城
來杜母漁
艇盡遊仙

落木江在縣東三十里流至天生橋入安化界

乾溪在乾賽舖流爲石阡河又城西北二十五里亦

有乾溪

網陀溪在縣北二十里流至沿河司入於德江

秀寶關在縣南三十里疑卽繡關邑人趙富殉節處

帥機詩羊腸曲曲度岩頭誰向空中結戍樓石磴層梯臨結壑一夫當此可無憂

犵狓關在縣東七十里疑卽牛狓關

廢思印江等處長官司通志云元置卽今印江縣治明改爲縣山志云相傳舊司治今甲山寨是今按甲山卽峽口寨在城西五里有三清觀宋乾德間建西巖寺亦近在寨西是思印在宋實入版圖卽未置縣長官司疑非始自元置也其移之今縣治蓋是元時然無考

巡檢司在縣西南二百一十五里明洪武初陸公閱以功授覃韓偏刀水巡檢司土巡檢萬厯間領於安化縣子孫承襲至今故其村寨稱巡檢司云

蕭重望宅在甲山重望安化人嘗愛甲山兩居焉而居甲山時尤多孫其朗爲陳氏贅壻因家此邑士以重望疏請建學旣祀諸鄉賢而丁祭又致胙其家以爲常

廢思邛縣乃不在今縣域之中在鎮遠府城東九十

里鎮遠又有思邛山及都波都來二山皆舊思邛地
意唐縣廣遠廢後土官遷徙不常不能盡有割而他
屬要之爲邛江古蹟得并論之

舊志曰思南之地務本力穡貧不爲盜屏異教行四
禮黜浮崇實士駸駸慕正學庶幾文獻之風猗歟休
哉蓋邛江風俗與之同也今雖不逮古初矣而勤儉
猶昔士無輿馬裘佩之奉婦鮮紅紫膏脂之飾田各
自耕爲備不售五夜巡城巷杼柚聲軋軋相聞也諸

大姓聚族而居每立宗祠春秋必祭婚喪儉約富不
耀貧惟土瘠民勞時爭小利相齟齬亦無幾耳誠得
良有司久於其任字而楙之不欲以弭盜明德以息
訟政簡刑清之後嚴保甲興學校士庶相孚以圖富
教安必不能復逮於舊所云耶至若慶壇衝儺崇信
端公又間歲一祭封神吳龍楊石四姓主之蓋犇狔
之遺不忘其本故未爲大戾云

建置志第二

縣署在城內北抵察院垣東自堂以北抵鹽火巷以南抵典史署西抵打銅巷明知縣文建後燬於兵

國初邑令皆僦屋以居康熙十一年知縣元捷因舊

址為之倉十有二在後院并左右夾道中明有帥機

修堂記

印江縣印土司郡志莫詳其始孝皇御極之七載始更置邑迄今凡百禩矣惟是草創疎

畧歷數十今無能易非當事之憚煩由財用絀乏經畫艱也萬歷辛巳夏莫令奉今上命蒞印甫旬日值大雨江水溢居田稼令齋民徧禱邑中神水消落令巡行四野驗衝傷漂沒者狀白當轄常轄動心慨然欲題請蠲民租緣成厥功矣堂正廈三間額其中曰忠愛前為捍廳間如之後旁為耳房左右各壹間

中爲擾道接川堂堂前後各壹間堂東置庫房壹間
 迤東置糧倉南北相面各三間中爲廳壹間大門爲
 牙墻邑院後并左右關爲迴遭通道四城增重門設
 刺板上街內外並置柵局鑰嚴而啟閉時百襍來
 邑治犁然整煥然新諸般就緒者不可勝紀且財不
 費民不勞皆令之捐處有方也令之大造乎邑也厥
 功良亦偉哉予又聞印民土著少流寓衆賦役煩重
 健頌朋興號難治令持重鎮靜約己裕民稍稍興利
 除弊摘其要而去其甚若醫師之治羸不施猛劑徐
 調和其元氣而煦嘔之民被令之化若飲醇醪潛移
 默化罔知所自故其效徵於閭閻雍穆罔圉空虛虎
 狼屏跡苗藝慕化印旁郡邑司有大獄疑不能決者
 率取正於令令隨所至誠格而明通之人皆輪情服
 斷稱慈明令尹其經綸之蘊康濟之猷見於六議之
 陳皆安攘至計請當轄多嘉納行之道近之民引領
 懸望願見德化之風而令之秉心塞淵操行礪潔渾
 印江縣志 建置

建置

涵爲仁沉毅成義民不忍欺亦不敢犯雖循吏未多
讓殆空谷足音也印民何幸而獲令哉夫守令六事
自昔言之得民之難聖賢且爾此一邑也昔做而今
理此一民也昔徂而今乎天下事廢於因循而興於
振作古今民貳於杆格而信於感化裁推行神明
成信亦顧所存何如耳堂之係乎印風也豈淺鮮哉
後之君子尚鑒於茲令名與京字子徵別號寰冲廣
西南亭宣化人登隆慶元年進士少居鄉嗜靈修粹
博物洽聞聲實並茂余守郡時知令最深令政蹟則
思人同野古泉寓書語余類如此其厚積遠施蓋尚
未可涯涘也邑前令暨
典幕名並列於石陰

儒學在縣治北太陽山麓東抵路南抵文廟西北皆
抵民廬順治時知縣學澣因明舊建修明嘉靖以前

天下學生在學讀書官爲廩給晨夕燈火熾然後浸
微矣印學創自萬厯時以故明倫堂外齋舍缺如不
留餘地堂北教諭署數楹而已訓導署在學東路左
典史署在縣署東東抵鹽火巷西北皆抵縣署

土縣丞署在縣署南久燬遷居城北官莊壩

印江汎署在西門南外落水江兩路口纏溪板溪太
平塘地屬焉

陰陽學

醫學

僧會司在月鏡寺

道會司

申明亭在縣署後察院行臺廢址也前爲場市謂之
察院現廢思仁道署在縣署右今無攷

舖司在縣前一在涼水井其纏溪小田安厓野猫四
舖俱裁

龍津書院在龍津寺東一里而近乾隆初知縣文則

建嘉慶中知縣錫穀重修而自爲記

印江之有文閣也自史公諫始

後六十年而馬公士芳修之其側有書院也自黃公文則始亦後六十年而余修之於是乎有近奎之名春夏醕金鳩庀未半值余奉調襄校文闈邑人士籲於上憲而見允其留返治三月用潰於成廼額其堂曰時教齋曰時術勗正勤也夫學之務及時審矣苟正且勤道安得不日明德安得不日進人才安得不日出聞邑人卜科名者僉謂子年始一發怠人事而譏天道夫豈然哉今苗變就平歲豐民樂欣逢

聖天子右文敷化詔禮官議隆文昌祀典而吾書院成以其年人事異舊天道更新必有紹同野步蕭田炳映奎文綿延不絕異向時所卜者豈惟余望是副亦史黃馬諸君子所默以俟後學而不忘者與有

邑人王道行碑

辭冗不錄

知縣鍾英繼之取彌陀寺田租

給諸生膏火亦自爲記

前己巳邑侯馬公士芳講學龍津一時得人最盛繼馬公

而創修書院者黃公文則也歷年久遠遺址荒蕪嘉慶七年攝縣事張公錫穀修之名以近奎雖規模未及宏厥而有堂有齋結構整齊台階平治洵進德修業之所可稱善始者矣惟經費無幾不能延師肄業生徒亦無廩給會彌陀寺以侵食租穀許訟張公會謀爲膏火勞而未成余志迂拙力圖振興先更近奎之名曰依仁而爲之說復詳請各憲將彌陀寺地租撤入書院十三年八月秋潦在地親詣寺中止宿者十日窮山巖涉水溼聞雞而起戴星而歸凡土棍之所据估奸佃之所侵隱勾稽無遺於歲得穀二百石備脩脯外可廩給十人從余而任稽考之事者刑吏吳光斗稿吏戴際雲其餘執事者十人事成恰值改歲又當己巳事以時起人從天合所望多士魚魚雅顧名思義追黃成憲而上逮李同野田西麓諸賢

彪炳文章發爲事業科名鼎立鵲起蟬聯庶不
使張公修館爲虛車馬公望醫爲空言也夫 據碑

書院之名凡再易今日依仁較近奎美矣何若仍舊
名以龍津爲得禮意也

演武教場在書院東

養濟院在北門東內

普濟堂在北門外

場市在縣東者洋溪最大昔土埧危杆嘴纏溪次之
凱上坪楊柳塘鬼石口中埧南黃埧陳家溝孫家埧

黨家灣皆小大者乾賽舖西大田板庄袁家灣北板
溪沙子坡而毛寨差強然大亦不能百戶小惟茅店
十餘而已皆五日爲期天堂哨煎茶溪附安化市不
論下五里有格鹿了

祠祀志第三

文廟在儒學南明知縣鎔建邑人任思永記其事

在印

國初爲長官司治孝廟時始更設縣而土附郡庠校
藝險隔三江又諸縣司合爲一學賢路稍墜萬厯間
侍郎蕭公疏請建學旣得旨邑侯張公乃構地建
先師廟後爲明倫堂街墜二坊劉鄭兩侯相繼爲

門爲先賢祠郡司李楊公視篆時爲啟聖祠暨內垣
猶有度未稱完制也呼延侯以己未秋來受事下
車視學誨諸生畢慨然以營膳自任自捐俸外曲爲
劑量鳩工刻期而以其務屬學博胡公先兩廡次名
宦鄉賢二祠次泮池及儒學門不數月煥然一新黔
中學校印稱雄甲矣士生此者甄陶造就淑氣鍾良
爲聖爲賢爲卿爲相何莫非今日之修培學校致之
則數公經理之功宜志也蕭公名重望字劍斗安化
人張公名鎔字大治蜀之合州人呼延公名楫字巨
川關中之宜川人胡公名效夔字大韶興隆人例得
壽之石天啟
元年正月 順治十七年知縣學澣復之康熙中知

縣元捷知縣象乾先後重修歲久弗治嘉慶十二年

知縣鍾英倡衆更新名爲修而實建也有自記碑

弗文

稱不
錄

社稷壇在城西平興寨

風雲雷雨山川壇在城東發春坡上

先農壇在東門橋外

厲壇在北門外

城隍廟在縣治北

關帝廟在文廟右有知府姜登高碑

漢壽亭侯關聖
以忠法天下傳

後世通邑大都無不廟貌輝煌威嚴如在登高奉
命制史思南正值大師討賊集於斯土提鎮諸公俱

總總然以忠自矢每遇聖廟而相告曰彼何人也予
何人也有能忠者盛若是適見其廟之頽也而心惻
然卽爲遷地振新總鎮柯公彩倡厥始提台周公卜
世見而樂之發大歡喜以壯之鎮台陳公華蘭公泗
李公師膺李公懋功李公元祿鄧公秉志王公仕華
協厥謀副台六公格李公元英吳公聯暨各營副共
襄厥事前蒞思唐趙公佳材亦贊助焉所費梓材香
田共一百五十餘金藉其鳩工儻功則鄉紳趙名先
及千總萬壽也是役也豈惟風人臣媚天子哉蓋深
愧夫天下之爲人臣而懷二心者住持僧海澄與其
師昌節乞言以勒貞珉
因爲之記康熙二十年

文昌閣在儒學北知縣以成建一在書院右有馬士

芳碑

印江舊有文昌閣前己巳爲邑侯江南人史公
諫所建越明年庚午鄉試得售者有人蟬聯不

絕以兵燹頻年荒煙蔓草僅存二礎矣五十年來人
文衰歇百度廢弛思謀重建置諸夢寐者兩年嗟嗟
庫無羨丁無役立意撫綏休息而又欲興工勞人以
博不可知之數其可乎戊辰秋淮海府憲劉公星臨
德水化溢黔南三庠生徒鼓舞振作無不謂文翁開
西蜀之盛昌黎起八法之衰再見於茲值邑民以私
伐山木質成於公公仍付訊於余而木均非兩造所
應得余曰梓潼憑依將是在矣以覆公公曰可卜期
鳩工恰又己巳歲抄事以時起人從天合梁柱甫立
午秋報捷在昔秉鐸都梁亦緣科名久沉用青鳥家
言建經閣立石坊移泮壁次年辛酉遂中式名次亦
與今周子等雖口時數偶然類而推之補偏救弊正
如病者資醫未可盡諉於不可知而姑聽之也印江
僻在荒裔考古輿圖志屬武陵郡人文風土不異中
州病在田畝狹而民鮮儲蓄書籍乏而士寡取資前
己巳醫之得效今己巳醫之又得效繼予而醫者不

知爲誰大抵開荒蕪廣樹植治葛養蠶點茶種芋以
及購經史子集以博其辭章闡周程張朱以昌明其
理學皆印邑當急自醫歟余欲爲印邑醫而未逮者
總以俟夫後之君子操華扁善技補瀉而調劑之以
俾而壽而康至於斯閣風雨罅漏護持修葺又不過
甘黃片力留地氣厚風水一端云爾若謂獲驗而開
其先也則亦史公創也余何庸工始於己巳冬迄辛
未夏而閣成高以尺計可七十層而上者四觚而面
者八閣後築堂三間圍垣六十二丈招僧宗印住持
以奉香火贍田二十四畝爲某某施董工者某某捐
資有等以襄其事者某某咸悉其石是閣一名文塔時地時修修而復

地今又成基方議釀金興事未已云

名宦祠在文廟戟門右祀知縣六人訓導一人又祀

將軍葬依圖公福善都統馮國相尚書湯斌總督甘
文焜五君子者無案牘可稽未知其奚取也

鄉賢祠在訓導署內祀古今五人

節孝祠在察院垣北申明亭左祀古今婦女二十五
人

忠義孝弟祀在其右祀古今三人

火神祠在西門外曰赤帝宮僭名也當是祝融水府
祠在火神祠右祀宋蕭日軒黔陽官一名黑神廟在

東門北外祀唐南霽雲

尹公祠在書院內祀東漢尹珍以明李渭祔焉有知

縣杜昌埭記

嘗謂經學所以明知道道學所以體道孔門博約善誘或從知入或從行入及其

成功一也豪傑之士雖無文王猶興而天荒未破之志學為難而猿狂雜處之特立獨行為尤難余署印篆之明年夏索郡志得讀李公諱渭傳乃憬然曰士君子特患不自立耳何風教固殊之足固哉李公字澁之號同野思南人思南即古牂牁也明嘉靖舉於鄉歷任雲南左叅政居家孝友無間言四禮表俗以求仁為宗母意為的其交際也一介必嚴其弭盜也不欲自責從楚侗先生遊示以語曰近道之資載道之器求道之志見道之眼體道之基任道之力宏道之量達道之才缺一不可對曰獨愧見道眼未醒耳

遂鏗必為聖人四字著有先行錄大儒治規嗚呼是
非仁以行之教善行而不息者耶何其與尹公先後
數百年間同崛起於一郡耶南明僻處天未經學時
於東漢自道真始道學肇於勝朝自同野始不宜附
祠以發我同人所及景仰志耶前總憲蕭公重望有
先生思郡特祀記茲又耐祠於印江書院者世既未
遠居如此近孝弟務本之心當更油然而興起矣倘
於不能飭行時又難俟詳覆因倡
同志申私淑鄙忱云爾是為記

土主廟在縣治西今廢長思祠在文閣側祀馬士芳

今亦廢

田賦志第四

光十四年田凡一萬五千八百五十三畝零視乾隆四年增七百六十七畝零視康熙三十年增九百八十八畝零視前明原額尙減二千八百九十三畝零

戶原額四百六十五口三千八百六康熙五十年額丁五百七十二以後滋生永不加賦乾隆三十七年停止編審自是十年一修賦役全書吏憚擾民率以虛文應而戶口難稽矣可以知民數者保甲法存而

已道光十四年人丁七千一十九

賦二百七十六石七斗一升七合一勺一抄三撮丁
賦土糧一十五石一斗二升一合六勺每石折色輕
賚一兩條鞭二兩二錢七分五厘四毫四絲八忽六
微九塵八纖七渺馬館二兩三錢九分二厘八毫二
絲七忽八微九塵九纖二渺計銀五兩六錢六分八
厘二毫七絲六忽五微九塵七纖九渺加以課程塩

鈔共銀二兩一錢四分四厘蜡價蜡三十五筋一十四兩折銀通

計銀一千六百六十兩五錢三分一毫二絲六忽六微九塵四渺

耗羨例加一五而土例相沿升糧折色自一錢遞減至七分莫能畫一蓋自其祖父以來歲輸如是卽以爲令甲誠如是也黠民時以輕相嘗試而貪官汙吏有無能加毫末者矣余以其糧折色乘諸田畝計之已逾什一則賦又非輕顧有司歲計除支解外稍有贏餘卽旁費奪之養士勸農賞功辦罪一切取資無

有也歲一歉收坐視流亡典妻鬻子水齧田去而賦
存者比比焉自祠壇衙署以及城垣橋路堰溝之屬
急望歲修者又無不忍延因任而莫爲之倡措傳曰
無政事則財用不足今將以財用不足之故而無政
事可乎哉田少戶貧公私交窘司牧者克已足民可
也

正賦之外又有採買兵穀斗糧買穀五斗斗穀給銀
四分二厘五毫三圖分二以歲間永不折色不加耗

斛概徵昂而已

賑田九十一畝三分一厘四毫零徵穀九十一石三斗一升四合

學田三畝徵銀三錢又祭田八畝九分二厘三毫零徵穀二石六斗七升九合九勺

書院學田三十三畝一分三厘六毫零在城南四十里板山彌陀寺地租穀二百一石三斗又一十一畝六分三厘五毫在城北五里曾家坪租穀四十六石

五斗又一坵在發春坡下名羊子田一坵在中河邊
租穀皆臨獲中分申明亭右暨署西側官基租銀十
四兩八錢六分

物產爲黔通產者有通志在府志所書亦通三縣印
江無特產也惟大石墩山麓之稻米白而香甲於思
郡棉花自銅江口秀山負荷以來而印江之布衣被
遠方則女工之勤也桑亦有之然不養蠶云非土所
宜舊志謂印江淺狹亂石嶙峋不通舟楫余嘗自朝

底溯至木黃矣澄流淨碧無急湍焉獨安家洞下一
里而遙有龍門口險阻弗通通則商賈所趨竹木美
材桐茶捲油漆蠟皆奇貨蜀鹽價亦廉乃無窮之利
也夫十年樹木而小民爲終歲之計刊木墾山種藪
梁蜀黍及芋雨甚沙漂歲恒無獲且下墜田爲大患
今漸率而種樹矣故闢鑿之功余蓋將有志焉而力
莫能與也謹志之以俟將來



印江縣志卷之二

官師志第五

知縣自明宏治時有周文

山東人

曾贊

樂安舉人

劉燦

荊州監生

正德時有黃琮

嶧人未任卒

吳縉

吳縣人

黃金

番禺人

嘉靖時

有范邦

英德人

顏階

龍德人十年任

曾翔

京山監生十二年任

徐文伯

銅陵

舉人二十六年任

包萬殊

臨安舉人三十一一年任

王佐

涪州監生三十四年任

蕭

以成

廣元監生三十八年任

鄧以麟

應山監生四十四年任

萬歷時有雷

學臯

臨安舉人

趙鎔

大理舉人

陳汝和

昆明舉人

莫與京

廣西舉人

李華

黔陽舉人 卿廷彥 廣西舉人 徐震 大理舉人 張五典 仁壽舉人 鄭繼緒 廣西

舉人二十一年任 張鎔 合州舉人 李應發 昆明舉人 劉兆桂 閩中

歲貢 天啟時有鄭兆吉 常德歲貢生 呼延楫 陝西歲貢生 崇禎

時有郭寧 清化歲貢生 董一化 新州歲貢生 史諫 貴池歲貢生 施王

明 激江歲貢生 胡貴卿 西充歲貢生 陳明殿 晉江歲貢生

國朝順治時有劉學瀚 江都貢生 康熙時有林光祚

直隸貢生 蔣元搃 江西監生 顧枚 太倉舉人 劉名標

二年任 鑲藍旗監生 馬士芳 江寧拔貢生 郎象乾 仁和吏員

二十一年任 二十五年任 三十年任

楊國正直隸進士王國輔正黃旗監生王孫謀鄂縣進士潘晉晟福建

進士 雍正時有孫紹武 張之頊青浦貢生王任汝廣西舉人

林瓊福建舉人晏名世西江進士乾隆時有徐伉正紅旗舉人田在

公興津舉人顧濤崑山貢生黃文則新城進士林枚光侯官舉人十六

年 詹彬賢良方正唐枚 鮑棟麻城貢生楊日試雲南

拔貢二十 陶情陽湖供事二 鐵均元歸安舉人張夢弼蔚

八年任 舉人三 韓憲祖高陽舉人三 周品金侯官舉人三 施

發元彭澤進士三 德保正藍旗進士翰 馮豫亨鳳台監生

三十六年署 **李海觀** 寶豐舉人 三 **魯寶** 宛平吏員 三 **汪昇**

一三十九年署 **汪汭** 寶應舉人 **甘立言** 奉新舉人 **丁時勤**

江寧監生 **張玘** 寧夏進士 **吳珩** 溫縣監生 **李洋** 代理 **邱**

桂芳 太湖舉人 **陳澣** **孔繼睿** 曲阜舉人 **楊照**

嘉應舉人 **周克鵬** 長沙舉人 **陳起藩** 德清供事 **李澗** 江中

吏員 **周學瀛** 大理舉人 **羅裕遠** 星沙舉人

劉元圭 四川舉人 **嘉慶時有淤景熊** 仁和進士 **沈培元** 錢塘

舉人 **張錫穀** 沔陽進士 **梁鍾英** 絳州舉人 **宋瑛** 長洲監生

魏廷玠 柏鄉舉人 施學澍 寶山舉人 王沛霖 臨桂舉人

年署司河 昆明舉人 陳維玲 曲阜舉人 過靜和 含山舉人

年署裘申錄 新建舉人 杜昌培 山東舉人 道光時有黎靖

閩中進士 張步虛 鉛山維士 李振堃 黃岡舉人 曠麓

賢 衡山貢生 劉蓮 洪洞進士 熊琛華 高安供事 曲鳴

和 南部貢生 徐序經 番禺舉人 譚煒 德化拔貢 凡百有

八人其行事可知者二十九人而已

周文宏治八年任始建縣治不任威力而制度恢宏

清介愛人吏民悅服

曾贊端毅博文繼文之治亦得民心

顏階廉正和平縣東西壇澄清樓聚英樓皆其所建
徐文伯治尚鈞距縣舊倚山帶水無城也嘉靖戊申
苗賊龍許保陷仰江文伯與千戶安大朝同被執大
朝竊騎與逃歸始築城以守

鄧以麟沈毅有爲曾請建學士人感之

陳汝和溫良簡易有治才

莫與京存心忠愛行政公平自建縣以來百年因陋
至是一新思南李渭君子也目與京循吏云詳見帥
機碑

張瑤字大治清廉仁恕始建學宮定規制卓有政聲
旣去而民傳頌久之

劉兆桂有文名撫名訓士曲盡勤懇

史諫才敏政寬審編平允能絕弊端府志稱知縣有
此十人餘不論焉至載諸名宦惟周莫張劉與史公

而已史公後六十年而有馬士芳才雖不信然歟

林光祚蓋樂易人也能恤士當軍興芻午民賦升糧
派雜差銀至一兩二錢貧士張如翼書春帖子云只
見差來差去那知年舊年新光祚見之使贈之銀傳
語請張相公將對聯換去及如翼辭將遠適又款曲
留之緩其征

馬士芳字蘅原由盱眙教諭受知總督于清端公成
龍康熙二十五年任時滇逆初平民氣未復士芳一

意撫綏之揚八言自勉云報朝廷以清待百姓以仁
遵憲令以勤治奸頑以明告天地以誠律身心以平
興文教以經安義命以貧故其政蹟詳載甘棠頌思
集皆於言毋少戾矣所成就士如黃世發覃岱劉斐
等皆斐然可觀流風餘韻延至於今邑人士記之而
謂世世師焉公有以也六年行取擢禮科給事中累
遷至大理寺卿

郎象乾繼士芳之後留心造士貢生劉彬士芳弟子

也須象乾政尚清簡案無留牘吏畏民安百姓震恐
其心可以對衾影質鬼神而無愧云

晏名世德盛而短於才雍正乙卯春古州苗變聞警
亟命撤橋邛水僅尺許耳人竊笑焉然卒用紳耆王
祚顯黃宏智等率鄉兵守禦方內帖然智名勇功何
嘗必已出者哉

黃文則字周炳由吉安教授升任自盡已心不求聲
譽樹講堂築堤建梁扛合糧註皆出俸金而自奉

則蕭然寒素平訟獄人多感泣謂是不以彈丸玩印
江者也未及考成以憂去

林枚光歷任三年冰兢自矢自謂於勤能補拙退思
補過二語未能也顏堂曰補堂賢於剛愎者遠矣
楊曰試清慎而明畱心民事

李海觀字綠園能興除利弊愛民如子疾盜若仇乾
隆己丑秋邑大旱步禱滴水崖雨立沛百姓設筵迎
勞海觀教之食時用禮以度歲歉歡如也

德保以遷謫任座間書忠信篤敬四字常目在之可以知其志矣

王汧山志稱其喜夜巡聞紡織讀書聲輒加獎賞近城四寨民多有受其賜者

陳澐乾隆四十七年署任先是近城四寨派供夫馬甚苦民民劉某貧無催役錢乃肩輿至塘頭病斃澐閱牘惻然竟免之

劉元圭亦署任乙卯春苗匪擾松桃至太平場距印

江城二百里汎兵守閩頭坡時安化知縣羅裕遠署
篆督邏以老去元圭繼之乃編鄉勇設卡監旗授兵
防禦日分遣百餘人巡鄉會哨夜則鳴鼓擊柝分巡
城寨有無賴子嘯聚者得共治之號令嚴明人無敢
犯至四月松桃園改乃罷

沈培元嘉慶五年署任修陳澣之政民刻石記之

張錫穀字蓮濤攝篆一年風清弊絕縣書院在文閣
側錫穀來時夢梓潼神勗以修書院事至卽倡衆新

之以此尤得士心

梁鍾英字秋涓有才善斷繼錫穀能成其美二子者
皆嘗自比馬士芳者也乃其效可睹矣古人誠未易
企哉

司河字誠齋

過靜和與河皆著廉聲河目短視不協於時然吏事
頗精靜和雖寡斷去亦見思要其要無寬獄云

黎靖字藥階其爲人長者也以散賑有恩邑人私祭

之與黃文則林枚光張錫穀梁鍾英皆附馬士芳之側與士芳別祀文閣又有五人焉王國輔詹彬唐枚顧濤鮑棟所謂長生祿位者也惜佚其行事

張步虛蓋強項令思南命案委屬縣檢驗舊矣步虛不受命呼其役杖之然三十年來稱知縣者必曰二

張前有蓮濤後有古香古香步虛別字也有留別士

民詩區區杖纒本非温敢謂官清民不寃民協兩風終命賤官呼父母總威尊衣冠是我榮朱綬籃

籃何人給素殮制錦裁花都未了無由縮地到江村登場詩莫道迂還莫道狂聊從身退說登場荒莊價

印江縣志

官師

共煎茶火貧女偏工作嫁裳屢假衝途邀憲眷頻經
苦缺貸民糧而今一子堪兼僕清白官人返故鄉寄
青溪詩憶昔初彈宓子琴茫茫宦海肯浮沈獨翻數
十年前案不受鏘鏘暮夜金身刷波濤完舊路手裁
桃李長新陰一聯珍重分懸久在荷休休賞識心寄
黃平詩銅符脫去着儒冠回首星山記昔歡判牘形
勞脯未食評文筆秃意猶憊人家縱飲誰如我道路
高談不類官作吏微言今畧省寒生毛骨汗汗顏

典史郭如星新安人萬歷間由吏科給事中與同官

陳維春疏論楚璫謫任府志載之流寓蓋不事事云

邵士元見師旅考萬歷三十七年紅苗陷印江士元

死之有明一代獨得此兩人然亦偉哉

國朝則有張遇良陳旭順天章文昱永平譚世泰眞
定郭向高宛平張秉惠侯官陳德會大興史嵩陽湖
彭應枚中牟李塏丹徒夏永佑大興李朝柱沈永恩
張贊成宛平李鎔石門陳際韶漢軍馬永泰南昌喻
貴誠南豐吳煌元和莊世鏞宣化李樞上杭陳清義
大興趙一鶴高安劉天緯江山黃大觀雙流宋宏儒
大興陳起學武進汪守謙宿遷熊銜建安彭上達盧
氏常沐黃梅陳殿英鄱陽徐烜會稽謝文燿如臯沈

慰曾山陰潘智咸寧楊燁烏程姚經塘宛平林澍山
陰施廣元樂安游徵泰興寧鍾摺階平遠蕭瓊華潛
山儲敷恩金匱王用儀敷恩余至月餘方倚任之去
矣用儀現在助余治

教諭訓導故志不加分別有譚良朋胡效夔陳三才

宋朝卿高遴選石阡人林鐘許世俊貴陽人胡其仁彭永

年黃平人余戴四川人曾澈四川人許弘璧鎮遠府人蔣芝趙我

后平越府人王賓臣貴陽舉人胡求章安順人劉時偉王篆平越人

丁開韶 永寧衛 歲貢 牟是程 安順 歲貢 王悅 新貴縣 歲貢 後有教諭

十六人 劉世傑 平越縣 副貢 冷仕 甕安 舉人 王道凝 畢節 廩生 朱錦

雲 開州 舉人 楊正乾 畢節 拔貢 方象乾 劉名世 都勻 舉人 黃登選 貴州 拔貢

舉人 胡運隆 黃平 舉人 陳維新 清平 舉人 楊淳 平越 拔貢 孫謙 清平 拔貢 陳

天祥 黎平 舉人 陳 普定 拔貢 夏鴻時 麻哈 舉人 張其訓 安順 拔貢 訓

導二十一人 張潛 鎮寧 舉人 陳紳 麻哈 舉人 袁祖佑 玉屏 舉人 王士

杰 麻哈 舉人 張啓賢 思州 舉人 楊昌英 餘慶 舉人 周璿 貴陽 舉人 蕭巖

都勻 舉人 張其貴 開泰 舉人 李琳 大定 舉人 江登瀛 安順 舉人 王紹先

餘慶

舉人 周燦奎

普安舉人

傅師翟

仁懷舉人

楊步高

黔西舉人

金灝

廣順

歲貢 王廷芝

遵義縣人

金蕙

定番州廩貢

丁敖

貴陽歲貢

趙天賦

遵義

廩貢

翟奎觀

貴筑舉人

惟萬歷間訓導陳三才鎮遠府人抱

負淵宏體裁端雅多士賴之府志傳之名宦乾隆初

教諭方象乾貴陽府舉人諸生塑像事之

土縣丞張應璧其先蓋咸寧人宋紹興間有張恢者

從李顯忠征剿思州蠻洞以功授亞中大夫凱旋次

彭水偶疾蠻復叛來襲恢師子煥以計戰却之煥膺

力過人且多智術顯忠奏授思州宣撫司同知留鎮
思南思南者思州故治蓋今沿河司城子頭是而水
德龍坪思印等處皆在其南故也子坤載坤載子景
鳳景鳳子興仁元至正中改授忠顯校尉沿邊溪洞
軍民總管子義源襲明洪武初使其從子添性上圖
籍尋卒子添麟初授宣慰把總永樂中授印江長官
司正長官子儉儉子軌軌字時用別號南軒始造族
譜軌子純純子鶴齡宏治七年被苗兵失印坐廢遂

改司置縣五世至應璧以水西安邦彥叛督運有功授土縣丞崇禎十六年也

國朝順治十五年投誠准襲前職康熙十九年卒子仕發襲世發傳子承綱承綱傳子洪勸洪勸卒無子弟洪功襲洪功傳子希賢希賢傳子慶三慶三傳子雲錦嘉慶十年承襲無印聞其祖父時猶能佐縣理民統其宗族今族散而貧不能具衣冠矣盛衰之故豈不以人哉

人物志第六

唐思邗人物無徵矣南宋及元傳聞亦渺今之士著者大抵明初流寓江右楚蜀之人自改流開學數百年來雖無顯者而科貢有人孀以節旌獨多於他邑今故彙次之間略著其行事使後世足徵焉

科明宣德七年一人周冕

思南府黃州府教授

成化十五年一人石泉

思南學國子監助教彌勒州知州

十八年一

人吳溥

思南學大邑知縣

正德八年一人任相思南學南溪知縣

嘉靖七年一人戴廷詔銅仁學十六年一人陳嘉兆思南

學順慶推官楚府長史二十五年一人任效忠楚雄同知二十八年

一人任效廉思南學盧山知縣三十四年一人戴愈達思南學彭

水知縣四十年一人陳一龍定遠知縣

萬歷七年一人覃彥思南學順寧府通判二十二年一人張學

詩思南學尋甸軍民府三十一年一人黃榜隆昌知縣三十七年一

人陳永憲太倉知州

天啓三年一人陳一登

霑化知縣

崇禎三年二人任賓臣

遂州府同知

覃紹雷

宛平知縣

六年二

人陳萬家陳昌期

特賜進士南兵部職方司主事

九年一人覃

天麟

江陵知縣

十五年一人陳聖治

國朝康熙二十九年二人劉殷

思南學

周國棟三十二

年一人覃岱

雲陽知縣行取

三十五年二人黃世發

肅寧知縣直隸營田觀察使

王衍銑

石阡學廣順學正贈江川縣知縣

五十二年

一人周仁表

學正

五十三年一人徐彥

南漳知縣

張以心

北闈 劉養仁 巴縣知縣 趙集德 石阡學三人科名無攷附識之

雍正元年一人王祚顯 衍鏡子庚戌進士江川知縣 四年一人黃

宏智 世發子 七年一人李連璧 都勻教諭

乾隆六年一人李宏 連璧子 九年一人周禮瑄 仁表子 堯安教

二十一年一人柳枝英三十三年一人冉弘仁四

十五年一人吳啓泰五十七年二人張啓賢李廷動

問中 知縣

嘉慶十二年一人黃德中 廣順 十五年一人黃鏡清

天柱 教諭 十八年一人 陳鳳翥 二十一年一人 楊應震 遵

諭教

道光五年一人 周覺智 八年二人 廖文藻 李大融 廷

子乙未 進士 十二年一人 李同勳

貢明 萬歷三十年以前 目府學出二十有四人 任聰

王冠 張文 馬湖府 經歷 陳道 分宜 縣丞 陳表 廣元 知縣 任瓚 戴弼 南溪

知縣 戴璧 富順 主簿 張聞仁 遵義 教授 任維賢 任桂 陳嘉祥 羅江 縣訓

導 任繼芳 陳嘉養 馬湖 照磨 陳嘉禾 簡州 訓導 周汝器 舟徒 縣丞 戴

愈奇歸化知縣黃如菊石崑清平衛訓導嚴節陳嘉謨任樞六豐

教諭任思永德陽知縣劉章平陽教諭子監助教厥後由縣學出四

十有五人任思彥陳嘉祚萬縣訓導吳來鳳陳嘉問太平府教

授任登階分宜縣丞陳鼎新都縣訓導陳辰賓州學正王之謙梓潼知縣

任之龍陳一續豐城縣訓導任南衢陳一鵬周多祚陳斗

福州府通判丁泰張學古涇江縣教諭李先春任大寄涂廷侍

成都府通判任登喬戴灝陳萬仞沅陵縣訓導鄒國賢任

盡臣覃章陳萬邦任大轍任憲臣歸州通判張應垣桃源知縣

劉養清照陽知縣任登鰲廖世治陳昌明斗子獨山州學正吳章

華張其範馬龍州學正劉養泓天柱教諭劉為標沅陵教諭趙紹先

辰州府教授危天祿戴綸然任匯道羅士俊戴士選陳昌

言斗子都勻府教授吳之璠

其學與年無徵者張銳汝寧府通判張時熙王階贈江川知縣

楊舉石阡府教授張學夔劉彥陳萬國鄖陽府通判陳嘉彥分宜

縣丞劉熙和知縣張國柱嘉應州學正陳謨思州府教授張有儀陳

明泰練相巡檢劉魁普安州學正劉為霖章子任世臣劉為垣彥子

印江縣志

人物

十五

湘潭知縣

張雲翼

選拔辰州府通判

劉愷

鴻臚寺少卿

張羽翼

都勻府教授

楊初旦張科張其芳張鑑清劉長翔張元儀張其盛

蕭繼雲吳元甲凡二十有九人

國朝順治時一人涂震離

十七年

康熙時二十有五人周道隆

元年

歐陽銘

二年

陳萬宇

八年

池泗龍

十年

劉養志

十二年

任論道

十九年

周國鼎

二十年

劉

士顯

二十二年開州學正

劉思歆

二十三年

劉彬

泓養子二十五年

戴以忠

二十七年

戴言策

二十九年

王如鏊

三十一年

涂長進

三十三年

黃世甲

三十七年 劉榛 養泓子四 嚴恒典 四十年 陳元攀 四十年

劉乘 養志子四 張暉 四十年 戴以敬 五十年 戴士斌 五十年

歐陽肇漳 五十年 魏尙志 五十年 任元德 五十年

雍正時八人 王吉士 元年 吳鼎建 元年 陳煜 二年 李

聯芳 六年 譚四選 七年 吳儲正 八年 張鎬 十年 申兆哲

十二年

乾隆時四十有三人 陳大坤 煜子元 劉樊嚴瑩 元年 蕭

動禮 三年 任英 選拔 寇耀德 五年 李登士 七年 陸通轍 十年 馮應

元十三年 吳西伯十五年 劉夢魁十五年 魏立奇十七年

陳元聖十七年 陳姚嗣劉裔英十九年 歐陽溢二十年

冉希堯二十年 魏尙容二十年 張慶隆二十年 李臻二十年 陳

碩彥三十年 陳大璽十一年 嚴啓一十二年 嚴霆三十三年

任昂三十五年 任珩三十七年 楊儒泰三十七年 王式寧三十七年

田以靜三十九年 敖王式四十年 周密智四十二年 馮明昭

魏國俊四十五年 王世旭四十九年 涂世球五十年 王

世瑾思南 黃修智五十年 王道行之謙會孫五十四年 選拔涇陽歸善知縣

江英思南學 陳啓文五十七年 白聯奎五十八年 王榕式岸子五十九年

涂之翰思南學六十年

嘉慶時二十有一人任世士元年 戴秀士元年 張贊賢元年

王棟五年 泉縣教諭思龍 張承印五年 嚴九讓六年 晏秉元七年

任步雲九年 吳希聖十一年 張翼軫石肝學十二年副榜銓印江教諭未

任周廷徽思南學十二年 周察智十四年 陳天相十五年 陳達卒

十七年 龔敦本十七年 黃鱗修十九年 田洪昌二十一年 田文選拔

繁二十三年 王南英二十四年 恩敖興南二十五年 黃憲存思南學

道光時吳士偉元年張連元年李天錫二年張誕仁四年

周暹智五年涂之美思南學黃新中鱗修子吳錫元八年

周特智十年龍從雲十三年熊夢飛十四年田沐澍十六年

張維孝十六年李夢松十七年蔡文昭石肝學士

陳一龍縣西峽口寨人由思南學中式嘉靖辛酉舉

人心存忠厚家敦孝弟知江南定遠縣有循良之目

郡志稱學有淵源未詳也

任效忠亦由思南學中式嘉靖丙午舉人性孝友敦

行誼官雲南楚雄府同知以廉幹著與一龍同祀鄉賢祠

戴璧嘗寓燕邸同旅病爲親嘗藥餌顧念益虔同旅得不死其悃厚類然學使謝東山聞而慕之及接部璧已逝矣乃檄所司迎祀

任賓臣崇禎庚午舉人官宛平知縣陞遂州府同知在官清白平易敦崇學校值流賊張獻忠圍遂州與鄉官呂大器招義勇守城身先士卒賊尋遁府賴以

全通志稱宦蹟焉後家居遭亂兵被執

張銳字彥達以明經官河南汝寧府通判家人欲與鄰豪訟爭田與書戒之曰月之望八得來書閱竟不覺粲然爾曹何未之思耶所爭區土約值不過四五十金夫以四五十金勞父母官官不謂累屬應訟反以爾曹恃勢凌人况豪亦未必果如是之無良卽果爾請憑鄉老理論抑或經由宗子分割何者不可而遽云訟乎訟之象曰訟不可成也書曰嚚訟可乎吾

自分任汝郡以來在在勸民息訟雖未遽期無訟之
休風敢忘必使無訟之雅化焉知有司不有同情耶
且我嘗從大夫後清慎自矢敢遠交邦伯爲爾曹助
幸爲忍讓速卽消停豪亦尋當愧悔不然是不憫我
益令我增罪戾矣銳嘗攝府篆故有從大夫後之語
銳孫應世字明宇由舉人官知縣卓有政聲累
升至四川道晚年喪其獨子因目棘時艱請假歸
兩袖清風而已以隱居故踪跡莫詳焉山志約略著

之

陳斗字劒墟以選拔貢生官福州府通判性豁達恢
宏篤於友愛二弟求分產隨所欲與之或云官郡司
馬其舊宅今猶署驄馬大夫云子昌明亦拔貢生聰
敏博文官獨山州學正斗先世爲河南治水驛丞者
名友儒當萬歷時嘗積穀數百石賑荒縣東門水堰
而浩傷禾倡衆改築上流分水入城穿渠盈丈西灌
壩田捐數百金無吝色至今人皆食德焉祀忠義祠

陳昌期字五際斗從子也幼受母教在官行事無所
攷明亡後黃冠持鉢歸林下潛心道藏手錄玉經雪
窩定本及諸經註疏訂謬辨訛蓋以元修隱者也康
熙初壽終

黃世發字玉書父昭嘗奉母避兵倒鉤坪母適病賊
至昭不敢離同被執者四人死矣又昭刀忽折賊惜
刀并惜繫昭頸繩釋縛而後甘心焉昭乃裂衣奔脫
賊追之弗及舍之去母子獲全人以爲孝感致之世

發事父母亦以孝聞領鄉薦後以親老聚徒教授從遊及門者殆三百人康熙五十年蒞任肅寧卽以勸農爲亟教民樹畜積糞皆有法農器水車之屬嘗親製爲之式栽秧有不如意者竟赤足田中指示之興修水利躬親操作以鼓舞役夫其詞訟則隨時剖釋無畱滯也十餘年日雞鳴而起夜分就寢寒暑風雨無少怠雍正三年以勘報水災遲延被議旣解任猶日出賑貧墾地種桑無懈也逾年擢直隸營田觀察

使勸農一如在肅寧時而水利廣矣柏鄉雞澤等縣
至今食德行部視民如家人父子教誨諄諄案牘間
每提天理人心諭愚頑而風屬吏手批錄存傳誦令
人感泣而凡俗弊之爲農害者則必盡法除之以勞
成疾年七十二卒於易州水峪村廡八年春三月二
日也其任肅寧時有未完銀兩

特諭豁免令地方大吏資助路費使其子扶襯歸仲
子宏智字茂明雍正丙午舉人

劉櫟字長茂作諸生日與黃世發全爲知縣士芳所賞識而獨惟櫟號有理學著有木石軒詩集其兄彬亦有文名

劉棐字長垣美才博學選銅仁府教授以目短視拜上官偶誤見責拂衣歸終身不仕鬻鬻然也壽八十餘歲

周國棟亦士芳所推士也時又有天台謝國棟以石阡司理流寓思南愛梵淨山居焉值寇氛卜居印江

得黃庭羨門之學與人遊數日不食詩文小楷皆可
名家并精制藝國棟出其門故其文簡潔明清知體
要云

賈岱與周國棟黃世發先後齊名而岱文精悍過之
士芳官京師岱以公車北上從之遊最久濡染最深
自謂知雲陽縣取資師訓木本水源當非虛語惜佚
其行事岱同時若陳元攀吳儲珍戴時暘周仁表陳
煜歐陽肇璋嚴舉典王吉士張喁嚴恒典黃世甲黃

世勲戴以敬劉夢劉瑋王衍銑皆號馬公弟子云衍
銑子祚顯自有傳於乎印江之士其學出於李渭者
今莫晰其源流矣龍津講學文教彬彬然勃然興焉
然考其時知府爲淮安劉訥庵謙吉巡撫則濟南田
山薑雯也馬公內擢山薑實疏薦之訥庵尤近稱知
己士之遭際豈偶然哉宜君子之擇長也

王祚顯字邑岐雍正庚戌釋褐以知縣分發雲南署
永平篆丁艱歸服闋補江川縣江川當臨安衝道歲

運京錢需馬二百匹又舊報墾荒率多壓逼祚顯至
皆爲力請得減免民困以甦縣秋糧撥運省倉至晉
寧過海一日耳民久便之至是以糧道吏有求不得
改撥運建水陸程四日祚顯力持不可卒得如初乾
隆五年夏大旱禱西山卽雨數日雙龍鄉士民請曰
近城雨矣如遠鄉何祚顯卽單騎詣螺絲峰步禱止
宿齋壇一夜聽風聲不息明日鄉人至曰昨暮黑龍
壇龍掛夜果雨今四鄉霑足矣皆以爲精誠所格無

何以忤上官休致年六十六卒於滇子式寧扶襯歸

民泣涕送之二縣人又私祭之於西山寺式寧字和

民明經不第作老女嘆詩

年年添綉作衣裳冉冉韶光兩鬢霜夙興夜寐勤簪

火細針密縷繡鴛鴦繡出鴛鴦不奇巧還道阿儂設色好雖然不比夜來工洛陽兒女應亦少街頭簫鼓忽悠悠聞是盧家嫁莫愁回憶莫愁年幾許阿儂曾見學梳頭歲月辛勤渾不覺移步鏡前雙淚落面龐頻改色蒼蒼料應此身終寂寞閉門元坐長太息無端愁悶填胸臆不怨天地父母心不平但怨紅顏多

命薄

著有樹滋堂孝思錄斐嶼詩鈔式寧子榕字楚材

修甲山志亦古間史之流也子諸生時痕榕從弟棟

選龍泉訓導甫任卽歸今年八十餘尙健

王道行字竹邨精舉子業兼工書畫以選拔貢生分發陝西候補州判時教匪陸梁羽書劾午上官檄佐軍務草書批劄沛然有餘用軍功保奏升除永壽縣知縣署邵陽調涇陽縣以

覃恩馳贈祖容贈父自賢皆如其官尋丁母憂服闋改廣東歸善縣卒余幼時聞鄉父老道竹邨行事今忘之矣歛人程敦云竹邨爲人於聲色貨利宮室車

馬飲食衣服下迨博奕俳諧率無所好且多不解者
而獨專一於制義竝好書法然未嘗廢事下無稽案
上無稽覆嘉慶戊辰冬解邵陽任將入都公私交迫
窘急難名嚴寒正屈人皆狐裘重襲猶自着秋衣容
貌充然人不覺其單寒蓋以氣盛也每夜長憂劇則
請命題率成佳構有度一宵乞與二題者噫斯誠結
習使然與子德溥官廣西臨桂縣蘇橋巡檢

武職趙富思石營把總順治五年故明總兵張先璧

擁兵將入印富守縑閩報城中令居民速徙吾以身
代羣命矣當關益力以無援被執賊斷其手足釘諸
門富同時有曹士銓府庠生奉母避大石墩洞中被
執賊以士銓父應舉官遂寧知縣謂是宦家子拷掠
索金無所得欲及其母士銓以身蔽之大呼曰賊殺
我勿傷吾母遂竝遇害自後以孝聞者有邱崇聖廖
天培

邱崇聖少孤貧與弟崇儒竭力事母兄弟同居相反

愛間里有不孝弟者輒勸以至性語人多化之

廖天培縣學生年十六父病左右牀簟間親嘗湯藥
日夜不離父卒弟天敘甫歲餘家貧聚徒教授取資
奉母撫弟成立亦入邑庠母歿時天培年逾六十矣
猶哀毀廬於墓三年乾隆五年旌與富同祀忠孝祠
烈女明石氏李宣妻宣死守節終身御史王杏旌之
滁州胡松爲之傳曰節婦印江處士石某之女成化
己丑六月二十四日生弘治庚戌歸李宣姑歐陽氏

性嚴重石事之每可其意好治麻泉蠶繭性樸質真
率衣著五六載不易幃間中華靡相尙石獨以儉約
處之無恥色弘治乙卯年宣卒遺孤二長綻四歲次
族歲尙未週家素貧艱窘萬狀或勸其嫁泣曰遺孤
奈何且死之日何面目見君子於地下乃紡績以撫
二子嘉靖乙未臺使鯉湖王公按部旌以禮幣是年
七月十五日卒葬鯉魚浩宣墓之右歸宣時二十二
歲宣卒之年二十七歲孀居凡四十年卒之日六十

七歲柏泉子曰余他日讀春秋常事不書是矣至於
紀叔姬之卒與其葬則亦疑若常事然先師仲尼至
備書其年月若日而弗遺彼一國之君與其夫人若
當時之公卿大夫是何其名寵貴盛也乃泯然或不
少見於策書心竊怪之既思春秋之世功利熾然人
心大壞至於龍蛇戰野元黃異色賣國弑君弁髦名
器而秉節守義乃獨見於一去國無歸之婦人仲尼
安得不賢之以爲天下後世勸耶乃予居今之世得

傳李節婦石氏慨然長嘆爲一泣然焉誠不以富亦
祇以異蓋古今之同情如此余愧非其人不能使節
婦永有聞於後世如紀叔姬也雖然庸詎知世果無
其人乎感事悼時廢書於邑

楊氏任效廉妻效廉知盧山縣以採木之役卒於官
楊七日不食觸棺而死萬歷二十二年御史薛繼茂
題旌

陳氏呂爵妻爵死家貧或勸之改適則曰與其失身

以求溫飽不如死寡居五十年年七十卒

陳氏張鍊妻十九于歸未三年鍊死無子夫兄銳慮其孀苦迎之汝寧任所不往也年六十五卒

劉氏王朝妻嘉靖間鎮箠苗攻縣城被掠不辱罵賊而死

楊氏庠生任杭妻杭蚤死楊年二十守節終身隆慶二年院道旌獎

嚴氏代府典籍陳婁妻昌期之母昌期生甫周歲而

妻卒嚴年二十守節五十年家頗裕顧不許昌期衣
美食豐惟督令力學昌期舉於鄉不樂仕進家居夜
夢莊烈帝降其家詰朝而特賜進士之詔至人以爲
榮謂是義方之報也昌期蓋稔聞無事二姓之義而
能自靖於明亡之後是故求忠臣又必於節婦之門
矣

任氏陳玉藻妻張先璧屠印江城隨夫避長灘峒被
攻跳崖死年十九

向氏陳昌言妻鄉官宸女隨夫避張光璧至大田爲
賊所得罵賊受刃墜橋而死後八日出屍於水顏色
如生一云跳崖死

劉養燦女陳昌言甥也與向氏同避賊賊追之急懼
不免則墜崖死年十三

張氏任賓臣妻避亂紅崖底聞夫被執遂自縊張先
璧亂在順治五年時貴州猶奉明桂王子由榔僞號
稱永歷二年故茲四烈府志悉屬之明云明季印江

遭亂離屢矣邑之士女臣死忠子死孝妻死節簡不勝書而司土者不知其誰也然且歸咎於風俗而疑教化不能行後之人能毋赧然哉

田氏通判仁女字張佛蔭未嫁而佛蔭殤父母欲改字葵川申氏女不可曰翁姑老矣將誰依是時佛蔭父應世宦遠方女亦隨仁任所越四年母乃攜之一往省姑女曰今日卽張氏婦也遂留就養及應是棄官歸隱田氏部署拜迎執婦事惟謹翁姑卒爲安厝

撫從子爲佛蔭後亦殤竟以寡居終

皇清王氏郡學生張宏毅妻如翼母也歸寧至西埧
遇危寧周母劉氏與同行睹遺金不取相讓久之而
危婢始拾視之因立談於道左危曰我城裡姓危甲
山劉我後家也王曰我甲山張姓後家城裡姓王俄
而一人倉皇至詢之以遺金對二婦核之信卽命還
之歸各語家人張遂爲如翼聘於危結朱陳之好焉
張氏陳庶揆妻庶揆病割股肉療之愈已而竟死乃

矢志撫孤壽至八十三歲卒中年後善以推拿法醫

小兒應手而痊詳見甲山志山志又稱廩生王祚巍

妻彭氏 守節四十二年教子式輅入邑庠 王祚昇妻

劉氏 年二十寡居 楊邦杰妻吳氏 年二十餘夫死撫

廩膳 張遠思妻李氏 遠思死年二十五辛勤撫孤為

徐畢婚 陳元祿妻戴氏 年二十餘夫死撫遺 陳元伯

妻李氏 年二十餘夫死家貧紡 嚴魁先妻戴氏 年三

居撫子為娶媳生孫而子亦蚤死乃 此一村寨爾縣

印江縣志

人物

三

方內如諸婦而名湮沒者豈少耶山志又稱明陳裕

妻陸氏

年二十寡居七十
三卒不樂題旌

則旣載諸府志矣蓋以子

一續與孫聖治故也爲人子若孫者可不自勉哉

曾氏工部員外郎應兆女許字黃璞修未嫁而璞修

死女年十八奔喪成服請事舅姑家貧紡績自甘兄

嗣捷憐其少也爲議婚蔣氏氏聞之不食七日剪髮

毀容以謝冰人議乃息撫從子子中爲璞修後讀書

成立卒年六十六是殆聞田仁女之風而興者與氏

以乾隆五十六年旌表建坊而田則邑人罕有聞焉
矣

任氏戴應志妻夜赴中山守望秋禾攜小姑作伴止
草棚中夫族兄應宗潛身入伺小姑睡欲污之氏不
可強之氏以死拒之見殺卒不辱年甫十六嘉慶四
年八月二十六日也五年旌

其以節孝膺旌典者康熙時則有周祚豐妻李氏
二年

十一寡居家貧守義
壽至八十五歲卒
歐陽鈺妻吳氏
鈺死張先璧之
亂子肇華甫五

歲吳年三十四甫撫廩生周成德妻牟氏
華成立苦節四十五年仁表母也年二

十五寡居守節四十年乾隆時則有史正序妻楊氏
十年五十五年六適

正序九年而寡孝事翁姑撫子直書
入邑庠守節四十五年而卒五年廩生趙學聖妻

吳氏年二十七寡居奉姑課
子五十三卒九年戴志芳妻鄧氏
年二十

事翁姑如夫存日撫子生孫而子死
又撫孫如子苦節三十一年十年黃國柱妻覃氏

年二十九夫死撫子宏章入
邑庠壽七十七亦十年朱邦彥妻謝氏
年二十

子生甫六月家貧甚紡績易食以
養舅姑苦節四十五年十八年饒育萬妻唐氏
年二

十一適育萬未逾年而育萬死撫遺腹
子孝翁姑守節三十三年二十年庠生黃宏源

妻戴氏 年二十五宏源死家貧紡績以養葬
翁姑苦節六十年二十四年旌 嚴啓明

妻胡氏 康熙五十七年適啓明三年啓明死年二十
六家貧撫遺腹子養葬舅姑苦節四十二年

三十二年旌 魏人傑妻陳氏 大坤女也十九適人傑二十
年旌 一而寡撫夫幼妹爲之擇配

嫁之守節四十四 嘉慶時則有龔有諒妻田氏 二十
年五十六年旌

適友諒二十七而寡撫子敦本 道光時則友廖文元
爲縣學生守節三十年六年旌

妻嚴氏 年十七歸廖六年而夫死時夫兄文捷先亡
勸翁置筵生文藻而翁卒姑及庶姑相繼逝

又藻後領鄉薦氏之教 饒大明妻張氏 年二十一適
也撫遺腹子亦成立 饒四年而夫

死無子以夫兄之子慶第爲嗣事翁姑 增生田書玉
二十餘年夫兄家貧遠適迎嫂與共居

妻楊氏 年二十五適書玉四年書玉死守節三十餘年貢生沐澍遺腹子也 黎宏權妻

盛氏 庠生松芳女年十八適宏權不十年而宏權水死撫子大瑤成立孫枚亦人庠食餼守節四十

餘年四節婦 李廷杰妻田氏 年二十一夫死撫皆三年旌 孤守節四十一年 黃樂

中妻劉氏 年二十二寡居教子朝傑 白興德妻戴氏 年十六夫死無子撫從子

以爲夫嗣苦節四十五年 武生唐光堯妻鄭氏 年五十三守節 王廷幹妻陳氏 亦年二十八夫死子逾年

夫死守節 又死乃撫從子爲後貞壽 九十歲 楊勝泰妻傅氏 壽百歲與五節婦皆

八歲 又有劉殿 超妻全氏戴闡道妻唐氏劉國才妻張氏 三節婦皆有司給匾

超妻全氏戴闡道妻唐氏劉國才妻張氏 有司給匾

尙未
請旌

王之佐妻歐楊氏

已祀節孝祠偶不於乎盛哉
詳其事實附識之

印江之婦所爲貞節如是多者則以勤故蓋瘠土使
之然也然余書戴應志妻任氏又搵椀不忍措思夫
使其貧無廢禮何至此悲夫聖人言治教之必先富
之無足民之術而自文於勞思生善亦忍夫而已

余爲印江志以思南府志爲之本旣搜縣卷參以黔
書及貴州通志甲山寨志與夫黃王張諸家集乘證
諸親所見聞而隳括之以義法恨未能詳也故猶望

後之君子繼而正焉道光十七年夏五月五日書成